

白樂天文集卷之二

制

杜佑致仕制

勅蓋瘁事君明哲保身進退始終不失其道自非賢
達孰能兼之司徒同平章事杜佑以長才名畧為國
元臣歷仕四朝殆逾三紀出專征鎮為諸侯師入贊
台衮為王室輔嘉猷茂績中外浹聞寵任既崇勤勞
益至頃以年登致仕退請懸車方深倚注久未得謝
勉就牽率迨茲累年今抗疏披誠至于數四敦諭頗



切陳乞彌堅期於必遂理不可奪守冲知止佑實有
焉賢哉大夫今古同道宜從優異之命式表褒崇之
禮尚資耆望俾傳東朝可太子太師致仕如天氣晴
和亦任朝謁昔祁奚申叔皆就請老國有大事入議
否臧忠臣愛君豈必在位永觀前事期副茲懷

鄭涵等太常博士制

某官鄭涵等爾早以文行久從吏職輩流之間頗為
淹滯况雅有學識進脩不已禮官方缺宜當此選凡
朝廷禮制或損益有疑中外謚議或褒貶不決爾為

博士皆得正之所任非輕各敬乃事並可太常博士

除韓皋東都留守制

國之都府半在東周末遑時巡方委留鎮非位望崇
盛加之勤舊者則不足以允僉屬而副重寄也刑部
尚書韓皋名德之後鬱然公才正行通規貫于終始
累遷臺府連鎮藩維入脩職業出樹風聲故嘗遺愛
著聞中外况一登朝序殆三十年舊德耆望無后其
右俾入東夏僉以為然乃加冢卿以示崇寵敬服嘉
命永年未休可檢校吏部尚書東都留守

中書舍人韋貫之授禮部侍郎制

奉祭祀之禮獻賢能之書令少宗伯實兼二事非直
清明正者不足以處之中書舍人韋貫之沉實賢峻
文以禮樂行成於內和用於官公直之聲滿於臺閣
頃以詞藻選登禁掖秉筆書命時稱得人久積勤勞
宜有遷轉可使典禮以和神人可使考文以第俊秀
儀曹之選僉語所歸往脩乃官無替厥聞可禮部侍
郎餘如故

薛存誠除御史中丞制

庶官之職得人則舉况中丞執憲準繩之司所以提
振紀綱端肅內外蓋一職脩者其斯之謂歟給事中
薛存誠選自郎署列于左曹居必靜專言皆讜正章
疏奏議多所忠益可以執憲立于朝端况副相方缺
臺經是領糾正百官爾得專之夫直而不按威而不
猛不附上以急下不犯弱以違強率是而行號為稱
職敬服斯命往其懋哉可御史中丞餘如故

前長安縣令許季同除刑部郎中前萬年縣
令杜羔除戶部郎中制

前長安縣令許季同前萬年縣令杜羔等項自即署
分宰京邑而長吏待之小乖常禮雖同辭託故動未
得中然遠耻以退道不失正各從免職亦既逾時况
文行政能皆推於衆詢諸時議宜有遷授尚書郎中
方選才良憲部人曹偁膺並命季同可刑部郎中杜
羔可戶部郎中

京兆少尹辛秘可汝州刺史制

京兆少尹辛秘頃守吳興時逢擾亂安人殄寇節効
可稱出倅戎車入貳京輦亦有政績著于官常今以

汾汝軍郡之大方求良吏委之今憂詢事考能爾當
其選往即乃止以舒吾人可汝州刺史

除李遜京兆尹制

近歲京兆長吏數遷誠不便時抑有其故或鈐束不
謹吏緣為弊或鉤距太煩人受其弊既非中道皆不
得已而罷之宜求恬智寬猛相濟者親喻斯旨使久
於其職以惠吾人浙江東道觀察使御史中丞李遜
十年以來連守四郡或紛擾之際或荒饉之餘威惠
所加罔不和輯償其殊績擢在大藩自臨會稽一如

舊政况省科禁以便俗通津梁以息征動遵詔條深
副朝旨江南列鎮良帥則多集課程尔為稱首而
內史之選以難其人今予所求惟尔可使維表率州
部其委非輕然尹正京師所資尤急宜輟材於浩壤
行觀政於輦轂望尔有成無替朕命可權知京兆尹

除孔戣等官制

渾金璞玉方圭圓珠雖性異質殊皆國寶也是故能
官人者必辨而用之諫議大夫孔戣專靜貞白不涉
聲利執言守事無所依違駕部郎中薛存誠廉潔直

方飭以詞藻中立不倚介然風規吏部員外郎王涯
端明精實加之以敏懿文茂學尤推其時並歷踐朝
行恪勤官次諫垣郎署藹其休聲宜加公獎擢在近
侍左右禁闥可以同升必能評奏臺議發揚論誥臨
事立有屬詞可觀各隨所長分命以職祗奉乃事無
替厥猷戣存誠並可給事中涯可兵部員外郎知制
誥

除李建吏部員外郎制

六官之屬選部郎首之歷代以來諸曹郎之中擇其

踐歷久考第高加以有器局律度者遷焉今之選任
不由是矣兵部員外郎李建文行才理公勤課績可
謂具美宜居厥官歲調方殷勉勸尔事可吏部員外
郎

除劉伯芻虢州刺史制

給事中劉伯芻以文雅才名給事左闈實掌駁議再
逾歲時亦謂恪勤宜從遷轉而虢畧近郡黎人未康
藉尔良能為予撫字懸賞佇効勉哉是行可授虢州
刺史

除周懷義豐州刺史天德軍使制

西授降城充居邊要西戎北虜介乎其間委之郡符
建以戎號將守之選宜乎得人前汝州刺史周懷義
父列禁衛常從征伐又領軍郡率著勤功宜加獎用
可屬憂寄况茲要鎮實扼戎吭掎角諸軍肩鐻右地
牧人訓旅兼領非輕無替前勞在申後効可豐州刺
史天德軍使

除某官王某魏博節度使制

師長之選重難其人况河上列城鄴中雄鎮初喪良

帥思安衆心若親與人方膺是命某官王某出忠入
孝根乎至性好學樂善出於餘力發自脩已施于為
政可以守土可以長人今兩河之間三軍之帥是用
命爾領茲大藩澄清魏風輯理相土為我垣翰永孚
于休徃其欽哉無替厥命可魏博等州節度觀察使
除某節度留後起復制

懋勲德者慶鍾于嗣龍忠順者教本于親於是乎有
代及之恩有賞延之命所以光子道而激臣節也茲
惟舊典可舉而行某官某惟乃祖乃父勤勞王家咸

有忠勤書于甲令降及於爾六克負荷早承義訓久
倅戎麾自罹憫凶能著誠敬恭俟朝命靖安人心雖
在幼冲足可嘉獎今屬元戎初喪衆望顯然宜選親
賢以為統帥留府之事俾爾專之加戎秩以奪哀遷
冬官以示寵奉揚新命無怠前脩爾宜懋哉懋賞佇
効可節度留後檢校工部尚書

除薛平鄭滑節度制

武牢以東至于白馬形制之地水陸之會宜擇文武
兼備者以為守臣右衛將軍薛平自司禁旅為我取

牙訓整警巡能宣其力嘗使于絕國可謂有勞嘗牧于大郡亦聞有政况忠厚為質通明為用秉吏道之刀尺罷將門之弓裘可以為三軍之帥可以理千乘之賦得輟才於北落往節制於東方爾宜式遏四封輯寧百衆明簡稽以實軍旅信賞罰以勸吏人勉率乃職無忝厥命仍以冬卿副相兼而寵之可檢校工部尚書兼御史大夫

除盧士政劉從周等官制

君有舉左史得書之政有闕諫官得補之二職者歷

朝之清選也前侍御盧士政嘗在西川時為從事亂危僭伏辭潔其身前監察御史劉從周頃佐宣城奉公守正端士之操終然不渝時所稱論並宜甄獎况學術詞藻見推於衆並命清貫念以為宜記事盡規各行能効士政可起居即從周可右補闕

張正一致仕制

前諫議大夫張正一學行器用為時所稱擢居諫官與効忠讜雖年齒未暮而衰疾有加所宜願養不可牽率得移優秩以從致政可國子司業致仕

張正甫蘇州刺史制

浙右列城吳郡為大地廣人庶舊稱難理多選他郡
二十石之良者轉而選焉鄧州刺史張正甫自領南
陽僅經三載廉平清簡以臨其人安政和理行第
一宜以大郡推而廣之用旌前榮且佇來勅可蘇州
刺史

崔清晉州刺史制

右司郎中崔清以才良行敏補尚書郎頗積公勤宜
加獎任頃嘗為郡六聞有政平陽舊壤時謂名藩得

才與能方可共理安人訓俗佇有成績可晉州刺史

除柳公綽御史中丞制

中憲之設糾繆懲違一引其綱百職具舉非清與直
不稱厥官諫議大夫柳公綽忠實有常文以詞學介
然端直有古之遺風頃居臺憲累次即位詩平守正
人頗稱之擢首諫司器望益重今副相缺位中司專
席惟有守者可以執憲惟無私者可以閑邪詢事審
官爾當其選光昭新命振起舊章宜一乃心以揚其
職可御史中丞

除田興工部尚書魏博節度制

馭下安人其道不一或予能以次用或因効以拔才
所命雖殊同歸共理某職某官田興時屬本軍初喪
戎帥亂政或啓萃心不寧而興列在偏裨奮其義勇
議成必中事至能斷知畧所及指麾所加一軍獲安
百衆悅附連獻章疏恭俟命制有節有禮朕用嘉之
夫以將權如彼軍情若此先膺不次之舉可責有成
之功是用寵之冬卿擢為大將仍以印綬就拜軍中
行子敬之哉無墮乃力可檢校工部尚書兼御史大

夫魏博等州節度觀察等使

除鄭餘慶太子少傅制

東朝三少歷代重選不必備位在乎得人吏部尚書
鄭餘慶自明儉素有古人風發自脩身施於為政出
入中外多歷要重咸有勤績存于官次況動中禮法
學綜儒書是謂羽儀之臣可居師傅之任輔我元子
爾其勉歟可太子少傅

除裴堪江西觀察使制

江西七郡列邑數十土沃人庶今之與區財賦孔殷

國用所繫茲為重寄宜副長才同州刺史裴堪素蓄
器幹久經任遇日者資其忠良入為諫議大夫藉其
良能出為左馮翊曾未周歲政立績成區區一郡未
盡其用鍾陵要鎮可以委之夫簡其條章平其賦役
徇公率正以臨其人而人不安未之有也祇服朕命
往脩乃官仍兼中憲以示優寵可江西觀察使兼御
史中丞

贈杜佑太尉制

生有爵祿歿有褒贈此王者所以崇哀榮之禮厚君

臣之恩况有輔臣所宜加等某官致仕佑以通濟之
才公忠之節逢時入用為國大臣外領藩鎮內領台
鉉隕躬盡瘁迨過三紀左右千位之既六年大不慙
遺奪我元老憫然興歎實軫乎德亦言實除悒悒禮
命上公之秩用賁幽靈嗚呼錄舊旌勞知予不忘可
贈太尉

除孔戢萬年縣令制

京邑令缺多擇尚書郎有才理者補之兵部員外郎
孔戢自御史府遷夏官之屬凡所莅職一心奉公在

即署閭稱有名實加以文學緣節吏能得宰京劇佇
有成功

除裴向同州刺史制

馮翊之地密邇郊畿分內史之政參京師之化得善
所職其在得人京兆少尹裴向器蘊利用學通政事以
試吏治頗著良能累守大郡入亞天府奉上撫下皆
有可稱左輔之重尔膺其選况征賦猶重人庶未康實
望良才與之同治勉副所舉往備厥官可同州刺史

除武元衡門下侍郎平章事制

朕嗣守丕業將十年實賴一二輔臣與之共治故外
鎮方域則仗以為將有絳侯厚重之質有丙相寬大
之風自登台司克厭人望頃屬巴蜀軍後人殘權委
節旄俾往鎮撫信及夷貊恩加疲瘵每因利以施惠
不易俗而脩教政無苟得人用便安惠茲一方時乃
之績報政既以屬望益深宜歸左輔以參大政夫坦
然公道可以叙衆才曠然虛懷可以應羣物弼違救
失不以充悔為慮進善懲惡不以親讐自嫌用此輔
君足為名相欽率是道往復乃官可門下侍郎同中

書門下平章事

除李夷簡西川節度使制

征鎮之大實為蜀川西距于戎南漸于海有重江複山之險有長轂堅甲之旅水陸交會華夷雜居疇能治之我有良帥山南東道節度使兼官李夷簡以正事上以簡臨下仗茲器用累當任遇執憲之難也尔為臺臣其職甚舉司計之重也尔調邦賦其効可稱爰資長才出領重鎮自總符鉞于漢之南專奉詔條削去弊政均穀籍不一之賦罷舟車無名之征近悅

遠來歸如流水俗用丕變人迄小康三載考功尔為稱首進其右秩遷于大藩以均惠乎四方以旌勸乎羣吏昔文翁名於教化种嵩優於政能巴蜀之間遺美猶在不替前効可以嗣之佇聞有聲用光厥命可檢校吏部尚書劍南西川節度使

除袁滋襄陽節度使制

漢以二千石之良者入為公卿周以六官之賢者出兼侯伯內外之任所命則殊至於治軍國寵忠良其一致也戶部尚書袁滋奉上甚勤臨下甚簡安人附

衆尤是所長項資其能移鎮東都畧其科禁緩其征
徭政不滋彰人用休息在部七載績成課高墮書徵
還益聞遺愛老幼遮道事鄰古人朕方勤率恤疲民
褒獎循吏累月再命其有旨哉舉鄭滑之政也故旌
武公之美寵以司徒憂襄漢之人也故仗叔子之才
委茲征鎮類能而使其在此乎勉揚厥聲無替前効
可某官山南東道節度等使

歸登右常侍制

近侍之列騎省為貴歷代迄今遴選頗重必詢望實

而後命之工部侍郎歸登朴忠沈厚心無詭詐介圭
不飭止水無波澹然自居以致名稱抱此素行歷踐
清貫掌議左掖貳職冬官歲時滋深體望益茂可以
備顧問應對之選列言語侍從之臣冠附貂蟬立之
于右訪諸時論僉以為然可右散騎常侍

李程行軍司馬制

隋州刺史李程項自周行出分憂寄漢南大郡守之
五年頗著良能宜當選獎况專習文學通知兵事西
南重鎮初委元戎慎選副車尔當此舉三軍之重俾

往貳之仍加憲職以示優寵可御史中丞劍南西川
行軍司馬

李翱虞部郎中制

金州刺史李翱雅有文藝飭以政事早從吏職以領
郡符謹慎廉平頗副所任虞曹郎缺命以序遷敬茲
寵名勉守厥位可尚書虞部郎中

牛僧孺監察御史制

河南縣尉牛僧孺志行脩飭詞學優長頃對策于庭
其言甚直累從吏職頗謂滯淹訪諸時論宜當朝選

俾升憲府以觀其才可監察御史

裴克諒量留制

華州刺史奏華陰令裴克諒在官清白奉法考秩向
滿其政如初借留三年用觀成績朕方旌求良吏俾
養黎元適副所懷宜可其奏

張聿都水使者制

前湖州長史張聿頃以藝文擢升朝列嘗承祿養出
署外官名不為身志不可尚喪期既畢班序當遷俾
領水衡以從優秩可都水使者

薛任鄜坊觀察使制

鄜時延安抵于中部羗夷種落散在其間戎夏雜居易撥難理宜選寬明之使通知邊事者委以符節而糾緘之右金吾將軍薛任服勤戎職練達吏道出入中外綿歷歲年能一乃心以宣其力自加寵遇再執金吾微巡有嚴夙夜匪懈在公若是何用不藏况為人沈靜內肅外和按諾守封是其所善宜輟務於誰何得宣風於庶察庶乎勞徠諸部綱紀列城奉詔條以安人參戎索以訓旅欽承厥命徃復乃官仍踐冬

卿式光重寄可檢校工部尚書充鄜坊等州觀察使

韓愈此部郎中史館備撰制

太學博士韓愈學術精博文力雄健立詞指意有班馬之風求之一時甚不易得加以性方道直介然有守不交勢利自致名望可使執簡為史館官記事書法必無所苟仍遷即位用示褒升可依前件

李暈安州刺史制

宿州刺史李暈勳闕之門嗣生才畧以參戎衛頗著勤勞試守列城觀其為政屬汴泗之右創畫州居府

署城池委之經始一日必葺三年有成且聞公勤宜有遷轉重分憂寄再佇良能往安吾人無忝厥命可安州刺史

竇易直給事中制

前御史中丞竇易直器質識智厚重開敏文合法要學通政經累踐臺郎擢司邦憲寬猛舉措悉得其中官不易方府無留事前因病免今以才選得升鎖闥以備顧問夫制令奏議官獄典章苟有依違皆得駁正所任不細敬乃官可給事中

孟簡賜紫金魚袋制

漢制二千石有政績者就加寵命不即改移蓋欲使吏久於官人安其化也常州刺史孟簡簡易勤儉以養其人政不至嚴心未嘗怠曾未再稔績立風行歲課郡政毗陵為最方求共理實獲我心宜加命服以示旌寵庶俾羣吏聞而勸焉宜賜紫金魚袋

盧元輔杭州刺史制

河南縣令盧元輔蚤以學藝列在周行嘗守商都頗聞有政再領京縣益可其才江南列郡餘杭為大征

賦猶重疲人未康藉尔登車往分憂矚勞徠安輯稱
朕意焉懸賞旌能以佇報政可杭州刺史

白樂天文集卷之二

白樂天文集卷之三

制

京兆尹盧士政除檢校左散騎常侍兼中丞
瀛漠二州觀察等使制

勅夫疆理天下壤制四方乘時省置何常之有故方
隅未寧務先經畧則專委方伯以總統之及兵革甫
定思弘風化則並命連帥以分理朕常以幽薊一方
環封千里迺表廣莫專制實難屬元戎改轅新帥進
律因而制置以叶便宜蓋王者施張變通之要也京

北尹盧士政為人端和為政寬簡自尹北輦人甚便
安今司徒總籍甚爾名叶從人望河間列郡乞委士
政因而可之必易為理况新造之府經始之政勞徠
安輯是爾所能俾珥左貂兼報中憲寵任不細勉哉
是行可依前件

武寧軍軍將郭暈等五十八人加大夫賓客

太常卿殿中監制

勅某官某頃以齊寇發狂王師致討武寧裨將五十
八人雖有元戎指蹤制勝實由衆校同心許國合力

成功宜以憲秩儲寮寺卿府監舉申賞典用益勲庸
可依前件

贈僕射蘇兆男三人妻兄一人並被蔡州誅
戮各贈太子贊善大夫等制

勅故某官男某等淮寇之起爾陷其中能守父訓不
失臣節竟遇蜂蠆並為鯨鯢蔡將死而心傾劍雖埋
而氣在壽延禦侮禍及維私將賁幽魂宜追寵命俾
贈青宮之秩用申赤族之冤可依前件

王士則除右羽林大將軍制

勅羽林所設法上星文軍衛之中號為雄重稱茲委任不易其人左驍衛將軍王士則勲戚之家義方之子發身學劍餘力知書早踐班榮累參環列職述而身彌檢慎任久而心益恭勤卑以自居勞而不伐况一備禁衛四為偏將滯於久次宜有超升俾領上軍仍遷右廣統良家之騎士訓期門之材官寵任不輕無墮於事可右羽林大將軍

前穀孰縣令李季立授奉天丞兼監察御史
充廼鵬使判官制

勅某官李季立蕃國通聘使臣告行上請屬察同後王命以爾當為令長頗有幹能加之恪恭可備選擇假威憲職兼命邑丞足示優崇勉勤任使可依前件
李懷金等各授官制

勅博野鎮都虞候殿中監李懷金等戮力戎行叶謀王事既展于城之効彌彰奉國之心不加寵崇何勸忠勇敬授爵命勉思令圖可依前件

五日簡可朝散大夫德州刺史制

勅前代州刺史代北軍使五日簡吾聞任有才則事

集獎有勞則功勸以日簡嘗為代守軍睦人安旌効
拚能可居要地是用超登階級遷領郡符勵精壹意
其聽吾言夫主憂則臣勞時危則節見今寇戎暴起
封域未寧是忠臣奮奇謀烈士履殊効之日也朝立
功而夕受賞汝其命之哉可德州刺史

薛元賞可華原縣令制

勅前大理丞薛元賞旬服之制也樹以尹正承以令
長上下有統而理化行焉以元賞前為廷尉丞察獄
評刑頗聞敬慎寺卿奏課邑宰缺員故移欽恤之心
使布惠和之化上承爾長下字吾人無或越思而乖
統理可華原縣令

王承林可安州刺史制

勅安陸古鄭國矣介荆漢之間承軍旅之後宜得謹
身長吏以養理之也前相州刺史王承林比刺安陽
勤脩其職錄勞獎善故申命焉况爾生勳伐之家且
階寵祿宜自脩立以光大其門爾當思勤儉以檢身
務廉平以臨下率吏用賢勸人歸農勿慎勿佻一遵
吾之約束可安州刺史

嚴綬可太子少傅制

勅東朝保傅歷代尊崇漢擢名儒任先跡廣晉求耆
德選在山濤實資六博之賢用弘三善之道檢校司
徒兼太子少保嚴綬文雅成器恭謙致用出領重鎮
以帥諸侯入為大寮以長卿士歷踐中外嘗備艱虞
三十年勤志至矣况理心以體道知命而安時是謂
我誨之人可領調護之任由保遷傳爾其勉之可太
子少傅

源寂可安王府長史

勅義成軍節度判官檢校兵部員外源寂早膺尉薦
累展才能謀畫有終恭勤無怠守臣推善列狀升聞
可使束帶立朝廷曳裾遊藩邸俾從賓佐入補玉躬
鄭枋可河中府河西主簿制

勅鄭滑觀察推官試太子通事舍人鄭枋名列士林
職參軍府脩身無闕從軍有勞既展効於即戎宜試
能而補吏俾之糾邑庶有可觀可依前件

喬弁可巴州刺史制

勅權知巴州刺史喬弁前假竹符俾臨巴郡一意為

理五年有成州人借輦庶吏置奏既因會課宜及陟
明九仞之功無虧一簣無怛真授而忘初心可巴州
刺史

薛戎贈左散騎常侍制

勅夫有名於世有勞於國盡忠以事上遺愛而及下
則必生享寵祿後加褒崇所以旌善人而勸來者故浙
東觀察使越州都督兼御史中丞薛戎挺英於冠族
擢秀於士林凡踐官榮皆著聲績及授符節委之察
兼自江而東政成人艾老而將至病且知終方觀闕
庭而捐館舍是用廢朝軫念加賻申恩俾增九原之
光追備八貂之列可依前件

辛弁文可淄州長山縣令制

勅趙州臨城縣令辛弁文既有英材又知臣節逃遁
寇難奔走道途言念忠勞宜加恩獎俾換銅墨移宰
長山可依前件

知汴州院官侍御史盧濛可檢校倉部員外
郎陝府院官盧台可兼侍御史鄭滑院官李
克恭可試大理評事燭斌操可衛佐平依前

知院事同制

勅益鈇官漕運職大小遠邇羅布於四方自丞相播
薰領以來而擢大綏覆羣吏職以能進秩自課遷法
無僭差人有懲勸今台濛克恭操等咸當是舉分命
以官勉副已知無忝成命可依前件

王智興可檢校右散騎常侍兼御史大夫充
武寧軍節度副使領本道兵馬赴行營制

勅沂州刺史御史大夫王智興李源李愬之鎮武寧
也汝為俾將勵節忘身濟成大功汝實有力獎其誠

實擢授郡符海沂之間又著聲績宜加新命以寵舊
勞仍提銳師往副戎律夫將之撫衆如子弟則衆之
視將如父兄苟推赤心而無疑必蹈白刃而不悔勉
親士卒佇翦寇戎可依前件

田羣可起復守左金吾衛將軍員外置兼灑
州刺史制

勅前左武衛將軍田羣忠謹立身韜鈴嗣業自參戎
衛充見恭勤而燕薊之間澶為要郡公侯之後羣有
令名俾分符竹之榮佇濟多叢之美宜奪情禮記而

用之

楊於陵亡祖母崔氏等贈郡夫人制

勅大孝存乎始終殊恩被於幽顯追榮之命安可廢耶戶部尚書楊於陵亡祖母崔氏等風範有初光塵未昧發揮婦道標表母儀施及孝孫陟于高位夫蘊德者垂裕于後揚名者光昭其先俾將積慶於中故許推恩而上各從寵贈用顯貽謀可依前件

邵同貶連州司馬制

勅朝議大夫守衛州刺史兼御史中丞邵同寵在專

城職當守土不承制命擅赴闕庭違越詔條叛離官次將懲慢易宜舉憲章可連州司馬仍馳驛遣

鄭公達可陝府司馬制

勅朝議郎守原王府長史上柱國賜緋魚袋鄭公達衆推士行時許吏才自列班榮允彰恭恪夙夜匪懈春秋已高宜罷曳裾之勤往贊坐棠之理是為優秩用荅令名可守陝州大都督府右司馬散官勳如故

劉泰倫可起復謁者監制

勅朝議郎前行內侍省內謁者監上柱國賜紫金魚

袋劉忝倫古者有中涓謁者皆侍奉親近之臣今之
寵秩亦由舊焉况忝倫有行藝可以飭身才幹可以
掌務監臨內署朝請中闈謹密端和甚宜厥職以於
其事無之實難宜加進秩之恩仍舉奪情之典勉承
獎任勿替初終可起復朝議大夫行內侍省謁者監
王師閔可檢校水部員外郎徐泗濠等州觀

察判官制

勅前徐泗濠等州觀察支使朝議郎殿中侍御史內
供奉上騎都尉賜緋魚袋王師閔朕以師律授智興

智興以軍書辟師閔才既為知已用官不俟滿歲遷
所以使能而責理也然則贊兼察安戎旅既命之後
吾有望於爾焉勉副所從佇屢來勅可檢校尚書水
部員外郎兼殿中侍御史充徐泗濠等州觀察判官
勳賜如故

薛從可右清道率府倉曹制

勅薛品子薛從惟汝父昔守吾藩鎮能以忠力殄寇
安人嚮庸既以啓封延賞亦宜及嗣勉承義訓無忝
寵章可朝散郎行右清道率府倉曹參軍

義武軍行營兵馬使高從政等五人河東節
度行營兵馬使傅義等二十四人並破賊可

御史大夫中丞侍御史制

勅古者賞不逾時所以勸勲庸也爵有加等所以激
忠勇也而某官高從政等以義武之師統晉陽之甲
前蹈白刃中推赤心大挫賊徒連告戎捷超崇速賞
爾實當之故視軍功遞遷憲秩破竹之勢其思有終
可依前件

故奉天定難功臣試殿中監陳日榮等一十

二人可贈高鄧唐隋等州刺史制

勅春秋崇褒善之義國家厚追崇之寵其身歿而名
不殞時去而道不遺乃者大司馬得稽勲籍舉而行
之故某官某等凡十二人據狀徵書宜加寵命飭終
之典其可廢乎可依前件

段斌宗惟明等除檢校太理太僕卿制

勅義武軍節度都押衙兼侍御史段斌衙前虞候檢
校太子賓客宗惟明等寇虞未平府校方用宜以爵
賞勸其忠勞而斌奔命獻俘惟明奉章告捷各勤乃

事成造于庭並加寵榮以示優恤斌可試太僕卿依前兼侍御史惟明可檢校大理卿餘各如故

戶部尚書楊於陵祖故奉先縣主簿楊冠俗可贈吏部郎中於陵奏請迴贈制

勅故某官楊冠俗貽厥孫謀垂裕後世揚其祖美不忘先也以冠俗之棲蓬下位道居於時以於陵之光大其門慶鍾于後生不逮事政有追榮宜加義率之心用舉飭終之典可贈吏部郎中

劉悟妻馮氏可封長樂郡夫人制

勅古者有策名命婦賜號夫人蓋積善於閨門而受封於國邑也澤潞節度使劉悟妻馮氏承芳茂族作合良臣成此忠貞之功因加輔佐之力禮從夫貴度叶家肥俾開大郡之封以正小君之命可封常樂郡夫人

夏州軍將二人授侍御史制

勅某官某等早稱武藝以隸軍麾稟命元戎殷勤王事或千里移鎮從為紀綱或十乘啓行以為肘腋軫歷年月積成勤勞不加寵榮何勸忠効並命憲職宜

敬承之並可兼侍御史餘如故

日試詩百首田夷吾曹璠等授魏州兗州縣

尉制

勅乃者魏兗二帥以田夷吾曹璠善屬文貢置闕下有司奏報明試以詩五言百篇終日而畢藻思甚敏大理多通賢侯薦延宜有升獎因其所貢郡縣各命以官而倚馬爰來衣錦歸去以文得祿亦足為榮可依前件

衛佐崔蕃授樓煩監牧使判官校書郎李景

讓授東畿防禦巡官制

勅某官崔蕃等咸因文行自致班序或佐衛蘭錡或典校蓬山各從所知將展其用夫師教司野備禦郡畿所以班馬政而遏寇虞也茲皆重務爾勉贊之可依前件

李愬李愿薛平王潜馬總孔戢崔能李翔李文悅咸賜爵一級并迴授男同制

勅封爵之設在乎賞勸有以褒德有以序勳善報功實由茲道而某官李愬等或望崇台鼎或委重旅

施爰及藩條共分憂寄有勞於事無怠于心宜疏爵以啓封許推恩而及嗣祇受厥命永字于休可依前件

故工部尚書致仕杜羔贈右僕射制

勅故某官杜羔生於士族發為公器敦厚孝友本乎天性文學政事出於餘力自立朝右藹然素風司諫平刑駁議廉問凡所踐歷不懈于位以年致政以疾就地出處進退皆叶時中遽此淪謝惻惻興念夫生有榮祿歿有寵贈所以極君道厚時風品望人有始

卒之義也宜追端揆以申褒飭猶有精爽知吾不忘可贈尚書右僕射

幽州兵馬使劉悚除左驍衛將軍制

劉悚凡

勅某官劉悚夙負氣槩早習騎射才推燕趙之士學究孫吳之書加以忠厚可當任用况有令弟為吾信臣節著堅貞情鍾友愛夫寵寄於外莫重於藩垣委任於中莫親於禁衛如此一職寵示二人豈不為榮乎出叔處可左驍衛將軍

前幽州押衙瀛州刺史劉令瑒除工部尚書

致仕制

勅某官劉令璆勲伐之家弓裘之嗣嘗脩戎職六領郡符迨此遲暮知有止足夫壯而奮發以忠事國老而知退以道安身人所難能理宜加尚俾超崇秩以寵高年可工部尚書致仕

盧叢等除御史評事制

勅幽州節度判官盧叢等幽薊重鎮盧龍舊軍是吾北門委在上將實資寮佐以濟謀猷爾等或參務戎旅或專司奏記俱因事任各展才能而御史府官建

尉寺吏用申褒獎以勸忠勤勉奉元戎佇成嘉績

張偉等一百九十人除常侍中丞賓客詹事等制

勅盧龍軍押衙兵馬使什將隋軍某等夫爵賞行於上則忠勞勸於下有國之典其可廢乎吾思薊師自將及吏合聚衆力鎮寧一方綿以歲年積成勤効今以朝右貴秩官坊清班舉為寵章用申鼎獎

梁遜等六人除范楊管內州判吏縣尉制

勅盧龍軍節度要籍梁遜等咸以幹能早膺任使各

參軍要同濟戎功言念恭勤宜加優獎郡掾邑佐分而命之仍兼舊職勉申來効可依前件

渤海王子加官制

勅渤海王子舉國內屬遣子來朝祇命奉章禮無違者夫入脩職貢出錫爵秩茲惟舊典舉而行之

石士檢授寵州刺史制

勅石士檢東川帥涯上言士檢久習武藝兼通吏事可使為郡責成其功吾聞江油巴夷雜處勿以遐陋而忘緝綏奉法愛人無負知已可寵州刺史

韓長授尚輦奉御制

勅韓長局分六上職奉七輦茲惟優秩列在通班以爾立身頗恭守事甚謹宜有所獎可升於朝可尚輦奉御

孟存授成都府少尹制

勅孟存嘗參劇務之牧蜀人咸有能名得於主帥三蜀征鎮屯于成都雖有忠賢委為尹正子於贊脩庶務通統諸曹承而貳之實資亞理勉勤厥職無累所知可成都府少尹

杜元穎等賜勳制

勅中書舍人杜元穎等有位於朝有勞於事不加慶賜何勸恪勤宜各策名列於勳籍可依前件

商州壽州將士等賜勳制

勅某官某等夫勲者所以馭貴叙勞光身庶族非因大慶不降殊恩尔皆委質從軍服勤事國宜按勳籍分而賜之可依前件

內侍楊志和等授朝大夫制

勅楊志和等咸分要職列在內司慎靜檢身恭勤守

事宜以章綬命為大夫佩服寵光尔無失墜可依前件

內侍常趙弘亮加勳制

勅內侍常趙弘亮等列名禁籍祇命宮闈多歷歲時積成勞劬宜加勳賞以洽恩榮可依前件

烏行初授衛佐制

勅烏行初重胤之子早稟義方詩禮弓裘式聞不墜賞延之典本勸忠勲環衛之官兼資慎擇非惟父任亦以才升可左衛胄參軍

白樂天文集卷之三
烏重胤妻張氏封鄧國夫人制

勅古者夫為大夫則妻為命婦况在小君之位未加
大國之封豈惟有廢徽章抑亦無勸忠力也某官某
妻某氏以鳩鳩之德作合邦君輔成勳猷駟致爵位
雖從夫貴未授國封今以南陽本邦善地賜為湯沐
加號夫人茲乃殊榮足光閭閻可封鄧國夫人

白樂天文集卷之三